

井拂空增鶴唳。過牖合琴聲。况復當秋抄。偏宜在月明。不知幽澗底。翻翻有誰聽。

樂遊原春望云。樂遊原上望。望盡帝城春。始覺繁華地。應無不醉人。雲開雙闕麗。柳映九衢新。愛此偏高野。閑來竟日頻。

題邵公禪院云。無事門多掩。陰階竹掃苔。勁風吹雪聚。渴鳥啄冰開。樹向寒山得。人從瀑布來。終期天目老。擎錫逐雲回。

悲老宮人云。白髮宮娃不解悲。滿頭猶自插花枝。曾緣玉口君王愛。准擬人看似舊時。得仁貴主之子。自開成至大中三朝。昆弟皆歷貴仕。而得仁苦於詩。出入舉場。三十年卒無成。常自述曰。外家雖是帝。當路且無親。又云。帝族外王是。中朝親故稀。翻令浮議者。不許九霄飛。既終。詩人競爲詩弔之。僧栖白詩曰。忍苦爲詩身到此。冰魂雪魄已難招。若教桂子落墳上。生得一枝冤始銷。

吟苦曉燈暗。露深秋草疎。舊山多夢到。流水送愁餘。(句)風定一池星。(句)

右張爲取作主客圖。

宿宣義里池亭云。暮色遶桐亭。南山幽竹青。夜深斜舫月。風定一池星。鳥喚無人傍。菰蒲有鶴翎。此中休使得。何必泛滄溟。